

# FRAKSHON DI PNP

Presidente di Parlamento di Kòrsou  
Señor Fergino Brownbill  
Wilhelminaplein #4  
PRESENTE

Willemstad, 25 di mart 2026



Tópiko: 'PETISHON PA REUNION URGENTE KOMISHON SENTRAL TOKANTE E KAPASIDAT TURÍSTIKO DI NOS PAIS.'

Referensia: PNP-FR-2026/0719

Apresiabel Presidente di Parlamento di Kòrsou, señor Brownbill,

Hasiendo uso di artíkulo 33 di Reglamentu di Órden di Staten di Kòrsou, Frakshon di Partido Nashonal di Pueblo (PNP) ta aserká bo persona ku e petishon urgente pa yama un reunion di Komishon Sentral mas pronto posibel.

Kòrsou ta nos orguyo, nos kas, i nos herensia. Komo representantenan di pueblo, nos ta brasa desaroyo ekonómiko i e bishitantenan ku ta skohe nos dushi tera komo nan destinashon. Sinembargo, nos ta konstatá ku e kresementu eksploivo, partimentu di pèmitnan i aselerá di turismo aktualmente ta tumando lugá a kosto di e Yu di Kòrsou.

Turismo mester ta pa Kòrsou, no Kòrsou pa turismo. E ekspanshon aki ta pone un preshon inmenso riba nos infrastruktura (manera entre otro awa, koriente i nos kareteranan), ta pushando e yu di tera afó di e merkado di bibienda, i ta menasá e outentisidat i e naturalesa ku ta e alma di nos pais. Tur kresementu mester ta duradero.

Resientemente, e sektor turístiko mes, pa medio di **Curaçao Hospitality and Tourism Association (CHATA)**, a bati alarma. Nan ta boga pa un reorientashon stratégiko i un turismo di balor haltu i impakto abou pa protehá e balansa entre kresementu i e bienestar di nos komunidad. Ora e sektor mes ta pidi pa hala un rosea i nos mester wak bon kiko nos ta hasiendo, i Parlamento no por sinta brasa krusá.

Pueblo tin derecho di sa kiko ta e límite di nos pais. P'esei nos ta deseá transparensia riba e asina yamá '**Destination Carrying Capacity Study**'. E estudio aki mester ta e kompas ku ta guia nos '**Tourism Masterplan**'. Sin dje, nos ta riska di destruí netamente loke ta hasi Kòrsou asina úniko.

Kontrolá. Proponé. Mehorá.



Partido Nashonal di Pueblo

Pa garantisá ku e desaroyo di nos pais ta pone e Yu di Kòrsou i nos herensia na promé lugá, Frakshon di PNP ta deseá pa trata e siguiente puntonan:


1. Presentashon i análisis di e konklushonnan di e 'Destination Carrying Capacity Study': Kiko ta e límite máksimo di bishitante i kamber ku nos Kòrsou por karga?
2. E vishon riba e 'Tourism Masterplan 2027-2032': Kon esaki lo garantisá e protekshon di nos kultura, nos infrastruktura i e kalidat di bida di nos hendenan?
3. Planifikashon Urbano (EOP): Kon ta bai atendé ku e dunamentu di pèrmit pa mega-proyektonan ku ta blòkia nos kosta pa lokalnan i ta afektá nos naturalesa i monumentonan?
4. Ehekushon di medidanan pa sigurá ku e sèn di turismo ta keda lora lokal i ta duna un bida digno na e trahadó i e empresario chikitu i mediano di Kòrsou.


Mirando ku e problemátika aki ta rekerí un bista amplio di tur aktor den nos komunidad, nos ta pidi bo amablemente pa invitá e siguiente instansianan pa e reunion aki pa Parlamento por skucha nan ekspertisio direktamente:

- **Curaçao Tourist Board (CTB)** - e órgano ofisial enkargá ku e maneho di turismo.
- **Curaçao Hospitality and Tourism Association (CHATA)** - pa representá e preokupashonnan aktual di e sektor privá.
- **Fundashon CARMABI** - pa duna un bista kla i científiko riba e kapasidat di karga di nos naturalesa, nos refnan di koral i e impakto ekológiko di e desaroyonan aki.


Sperando di a informá bo debidamente i pendiente pa e reunion di sumo importansia aki keda yamá mas pronto posibel, nos ta keda.

Atentamente,

  
Ruthmilda Larmonie-Cecilia

  
Ornelio Martina

  
PNP

  
PNP

**Miembronan di Parlamento (Parlamentarionan)  
Frakshon di Partido Nashonal di Pueblo (PNP)**

✉ [frakshonpnp2025@gmail.com](mailto:frakshonpnp2025@gmail.com)

☎ +5999 434-6077

🌐 [facebook.com/frakshonpnp](https://www.facebook.com/frakshonpnp)

**DI FUNDESHI PA PROGRESO,  
MASAL KU NASHONAL!**

**MIEMBRONAN:**

Lider: MP Ruthmilda Larmonie-Cecilia  
MP Ornelio Martina | MP Ruisandro Cijntje  
MP Sheldry Osepa  
Haicheline Rosinda | Elvin Gerard  
Gwendell Marcelina, Jr.

**NASHONAL TA NOS TUR!**